



MEMORIA XUSTIFICATIVA COMPLEMENTARIA DO CONVENIO DE COLABORACIÓN ENTRE A CONSELLERÍA DE MEDIO AMBIENTE E ORDENACIÓN DO TERRITORIO E A FUNDACIÓN INGENIERÍA CIVIL DE GALICIA PARA A REALIZACIÓN DE ACTIVIDADES E ESTUDOS QUE PERMITAN COÑECER A SITUACIÓN XEOLÓXICA-XEOTÉCNICA ACTUAL DO MONUMENTO NATURAL PRAIA DAS CATEDRAIS E A SÚA POSIBLE EVOLUCIÓN NO TEMPO COFINANCIADO NUN 80% POLO FONDO EUROPEO DE DESENVOLVEMENTO REXIONAL NO MARCO DO PROGRAMA OPERATIVO FEDER GALICIA 2014-2020

A Consellería de Medio Ambiente e Ordenación do Territorio, a través da Dirección Xeral de Patrimonio Natural exerce, entre outras funcións: O fomento de medidas de desenvolvemento socioeconómico dos espazos naturais protexidos; A divulgación dos valores do patrimonio natural; A xestión dos hábitats naturais, da flora e fauna silvestres, das paisaxes naturais e dos elementos senlleiros da xea da Comunidade Autónoma galega; A promoción da defensa integral da natureza e dos elementos que a compoñen; A conservación específica dos espazos que compoñen a Rede galega de espazos protexidos e da Rede Natura 2000 de Galicia ou doutras zonas de alto valor ambiental, sen prexuízo das competencias atribuídas a outros órganos.

Entre os espazos de alto valor natural atópase a praia de Augasantas, coñecida popularmente como “As Catedrais”, situada no extremo oriental da provincia de Lugo, no Concello de Ribadeo (parroquia da Devesa). Esta praia declarouse monumento natural mediante Decreto 11/2005, do 20 de xaneiro. Ademais sobre este espazo recae a figura de protección denominada “Zona de especial conservación As Catedrais” (ZEC ES1120005), dentro da Rede Natura 2000.

A Fundación Ingeniería Civil de Galicia, é unha Entidade de Dereito Público independente e sen ánimo de lucro que desenvolve actividades de formación, investigación e desenvolvemento científico e tecnolóxico, estando interesada en colaborar con outras entidades para asegurar un dos fins da formación e da investigación, que é a transferencia de tecnoloxía no eido da xestión do medio natural co obxecto de manter, ou no seu caso, mellorar a súa funcionalidade ecolóxica. Nesta entidade participan investigadores e técnicos de valía profesional e prestixio recoñecido posuíndo os medios técnicos adecuados para levar a bo fin actividades de interese xeral.

Por outra parte, esta Fundación ten experiencia acumulada no estudo da xeotécnica de elementos parellos, o que constitúe unha contribución relevante para a Consellería de Medio Ambiente e Ordenación do Territorio no establecemento de medidas para os usos futuros do monumento natural. Esta actuación conxunta e coordinada supón un fornecemento das sinerxias entre a Consellería e a



Fundación, como entidade sen ánimo de lucro integrada na Universidade da Coruña, como se reflicte no “Convenio Marco entre a Universidade da Coruña e a Fundación Ingeniería Civil de Galicia para o desenvolvemento de actividades académicas, científicas e de transferencia tecnolóxica”, e no “Convenio de colaboración entre a Universidade da Coruña e a Fundación enxeñaría Civil de Galicia para a xestión delegada de servizos científicos, técnicos, artísticos ou docentes”.

Ambas partes están interesadas en celebrar un convenio de colaboración que ten por obxecto establecer as condicións polas que se rexerá a colaboración entre a Consellería de Medio Ambiente e Ordenación do Territorio e a Fundación Ingeniería Civil de Galicia para a realización das actividades e estudos que permitan coñecer a situación xeolóxico- xeotécnica actual do Monumento Natural da Praia das Catedrais, e a súa posible evolución no tempo; consensuar recomendacións conxuntas para os seus usos futuros, así como o reforzamento das sinerxias e colaboración entre as Administracións responsables das medidas de xestión e control e a comunidade científica, no relativo ás liñas de investigación e transferencia de tecnoloxía no eido da xestión do medio natural dentro do seu ámbito competencial.

En data 6 de xullo de 2018, o letrado asesor da Consellería de Medio Ambiente e Ordenación do Territorio emitiu un informe favorable ao dito convenio de colaboración, en tanto se tiveran en conta as observacións contidas no mesmo.

A presente memoria complementaria ten por obxecto xustificar o recollido no apartado 3 d) do informe do letrado asesor. No dito apartado se solicita que na memoria xustificativa se sinalen as razóns que impidan promover a concorrència, en concreto alude a que en moitas ocasións o obxecto do convenio ligado á idea de colaboración, fai imposible a efectividade do principio de concorrència.

En tal sentido, e como se desprende das cláusulas 2 e 4 do convenio, a actuación que se pretende desenvolver engloba actividades de colaboración entre a Administración autonómica e a Universidade, a través da Fundación da Ingeniería Civil de Galicia, de modo tal que o obxecto do presente convenio non ten un carácter contractual, no sentido de que se realicen prestacións por parte dun eventual adxudicatario a cambio de un prezo certo, senón de que as dúas administracións colaboran en desenvolver unha actividade de interese e competencia de ambas partes para acadar un obxectivo conxunto.

Mostra do anterior é que a Consellería de Medio Ambiente e Ordenación do Territorio colabora para acadar a realización do obxecto do convenio aportando persoal e recursos materiais (tal e como se



recolle no Anexo II do convenio). Así mesmo os resultados obtidos unha vez finalizado o obxecto do convenio pertencerán ás dúas entidades que o subscriben, polo tanto en ningún caso se trata dun resultado que se entregue á administración que contrata perdendo a súa propiedade intelectual e industrial, senón que tal e como se recolle na cláusula oitava do convenio, ambas entidades comparten a dita propiedade e poderán facer uso da mesma no futuro, xa que se incorpora ao patrimonio inmaterial de ambas.

Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fóra do ámbito de aplicación da Lei 9/2017, de 8 de novembro, de contratos do Sector Público, pola que se traspón ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, con independencia de que, de acordo co previsto no artigo 4 da devandita norma, lle sexan de aplicación os principios desta lei para resolver as dúbidas e lagoas que puidesen presentarse.

Documento asinado dixitalmente en Santiago de Compostela

A directora xeral de Patrimonio Natural

(P.D. Resolución de 09/07/2018)

A Subdirectora Xeral de Biodiversidade e de Recursos

Cinexéticos e Piscícolas

Susana Cuesta Fariña